

CBETA電子佛典集成

CBETA Chinese Electronic Tripitaka Collection
eBook

T20n1128

最上大乘金剛大教 寶王經

宋 法天譯

財團
法人

佛教電子佛典基金會



目次

- [編輯說明](#)
- [章節目次](#)
- [卷目次](#)
 - 001
 - 002
- [贊助資訊](#)

編輯說明

- 本電子書以「CBETA 電子佛典集成 Version 2023. Q4」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

西天譯經三藏朝散大夫試鴻臚卿傳教大師臣法天奉 詔譯

如是我聞：

一時世尊在廣嚴城菴羅樹園，與大苾芻眾六十萬人俱，其名曰：尊者大迦葉、尊者優樓頻螺迦葉、尊者那提迦葉、尊者須菩提、尊者尊那、尊者大目乾連、尊者舍利弗、尊者劫賓那。尊者摩呬捺囉尊者優波梨。尊者阿難，如是等苾芻眾六十萬人俱。復有菩薩摩訶薩，其名曰：師子威德菩薩摩訶薩、地藏菩薩摩訶薩、虛空藏菩薩摩訶薩、普賢菩薩摩訶薩、金剛手菩薩摩訶薩、除蓋障菩薩摩訶薩、觀自在菩薩摩訶薩、妙吉祥菩薩摩訶薩、寶星菩薩摩訶薩、鉢訥摩俱母那菩薩摩訶薩、常堅固身菩薩摩訶薩、寶嚴海慧菩薩摩訶薩、清淨妙音聲菩薩摩訶薩、燈光明菩薩摩訶薩、得妙音聲菩薩摩訶薩、如意光明菩薩摩訶薩、遍往世界如師子行菩薩摩訶薩、清淨無垢金光明菩薩摩訶薩、善威儀善行菩薩摩訶薩、從地踊持世王菩薩摩訶薩、天言說堅固音聲菩薩摩訶薩、得一切法自在菩薩摩訶薩、慈氏菩薩摩訶薩，如是等菩薩摩訶薩六百萬人俱。

爾時世尊從於口中放大光明，其光晃曜過於日月而有眾色，所謂青色、黃色、白色、紅色、綠色。有如是等無數種種色光，照於無量無邊世界乃至梵世。如是照已，還從世尊頂門而入。

爾時尊者阿難即從座起，偏袒右肩右膝著地，合掌恭敬白佛言：

「世尊！如來放光非無因緣。世尊今日放大光明，何因何緣？唯願如來應正等覺大慈廣覆為我等說。」

爾時世尊告阿難言：「如汝所說非無因緣。汝當諦聽，吾當為汝廣分別說。阿難！今有無量無邊眾生，得證無生法忍乃至得涅槃界。由是因緣，放斯光明。」說是語時，有一天子名印捺囉部帝，領四兵眾，及持種種供養之具來詣佛所。至佛所已，持諸供具恭敬供養，禮佛雙足住立一面，作是思惟：「我今欲聞甚深之法。」復以頭面禮世尊足，右膝著地合掌恭敬而白佛言：「如薄伽梵三界大師，乃至一切眾生之父。我如小兒愚癡無慧復無方便，又如盲人多於瞋恚。唯願世尊哀愍於我。云何方便令我諸根於諸境界，當使獲得無生法忍？」爾時世尊讚彼王言：「善哉善哉！知汝所問為於當來末法眾生，欲令彼等得無生忍。」於是世尊告大王言：「我有四種最上之法，若有聞者必當獲得無生法忍。」

爾時阿難在大眾中得聞是語，即前禮佛，合掌白言：「世尊！云何名為四種之法？」佛言：「四種法者，所謂聲聞乘、緣覺乘，此二

乘者但能自利不能利他。復有二乘，謂方廣大乘及彼最上金剛大乘。是名為四。」爾時阿難又復問言：「是金剛大乘當云何性？」佛言：「阿難！若有菩薩發於最上大菩提心，是即名為金剛乘性。是菩提心能自利益復利於他。如是菩薩摩訶薩行解於方便，能於諸根各各境界所緣所作，當獲無生法忍。」爾時彼王印捺囉部帝，得聞世尊為於阿難說是四法，甚大歡喜，次白佛言：「世尊！云何菩薩摩訶薩解於方便，能於諸根各各境界所緣所作得無生忍？」佛言：「大王！乃往過去無量無邊不可思議大劫之前，時世有佛出興於世，號曰清淨光明如來、應供、正等覺、明行足、善逝、世間解、無上士、調御丈夫、天人師、佛、世尊，彼佛世界名大妙香。是日清淨光明如來，壽量住九萬劫。彼佛世界所有眾生智慧猛利，皆悉發於大菩提心。時世有王名精進授，力如輪王，領四兵眾，前後導從詣彼佛所，復持種種香華奉獻彼佛。伸供養已作禮旋遶，踟跪合掌白言：『世尊！云何能令諸根境界所緣所作，當得無生法忍？』佛言：『大王！所有過去未來及與現在諸佛世尊皆亦說此方便，解於諸根各各境界所緣所作，而能獲得無生法忍。』時精進授復白佛言：『云何菩薩摩訶薩本性？』佛言：『菩薩性者，即是大慈大悲大喜大捨，而此四法是菩薩性。菩薩樂行如是四法，能為一切眾生使，獲無生法忍。』

「爾時日清淨光明如來，顧視左邊諸大菩薩摩訶薩，告金剛手菩薩言：『金剛手！汝可往彼精進授王宮中，如王所問金剛大乘，汝當為王及隨眾生種種根性演說菩薩摩訶薩行於方便，使令獲得無生法忍。』金剛手菩薩聞佛告勅，即從座起，偏袒右肩右膝著地，合掌向佛作如是言：『我今當承如來聖旨，行往度脫。』時精進授王聞佛告語，即向金剛手菩薩前頭面作禮而伸請曰：『唯願菩薩遵奉佛勅，愍察志誠，往詣我宮，為我演說金剛大乘，使我開解證無生忍，亦令當來一切眾生獲大利益。』時金剛手默然。王知許已，即整四兵前後導從，即與菩薩同乘還宮，及設傘蓋幢幡、香華伎樂供養菩薩。是時王城名曰最上，城中人民聞菩薩來，於所經路競以香華供養。菩薩既至宮已，精進授王復設七寶師子之座請菩薩座，奉獻種種金銀珍寶，及以寶瓶盛滿闍伽上妙香水，及以五種供養奉上菩薩。復有眾多苾芻之眾為欲聞法，亦持香華來獻菩薩。時金剛手菩薩即如從佛所聞法式入大曼拏羅，以金剛淨水與王灌頂。精進授王得灌頂已，復有諸苾芻眾及諸剎帝利、婆羅門、吠舍、首陀等，皆悉來詣王宮至菩薩所，為欲聞法，發菩提心入金剛乘。時金剛手菩薩便即為說菩薩摩訶薩行，及諸根法種相，及尼陀那方便等。乃至如來部、金剛部、寶部、蓮華部、羯磨部，依金剛乘相應及三摩地、三摩鉢底等方便，皆令得解盡涅槃界。爾時南印度王精進授，

是王深信敬重樂求最上法入金剛大乘。又復樂求隨眾生根性相應三摩地、三摩鉢底，解於方便，獲無生忍盡涅槃界。復有北印度王名尾哩野嚩哩摩亦如是，東印度王名妙臂亦如是，西印度王名百臂亦如是。復有百千苾芻，共持眾寶上妙衣服，同時來詣菩薩之所，供養恭敬作禮旋繞。白菩薩言：『我等深心樂求最上金剛大乘，亦復樂求隨眾生根性相應三摩地、三摩鉢底，解諸方便證無生忍盡涅槃界。』是時復有國中人民之眾見聞隨喜之者，亦皆發起大菩提心。時世復有眾多金剛阿闍梨，所謂覺龍、覺授、法龍、賢授、德授、海授如是等阿闍梨，得聞菩薩所說相應之法，皆悉證得無生法忍。爾時東印度王妙臂，與中宮后妃嬪嬙^姪女，乃至城中人民樂法之眾，而於根本最上法中三摩地相應之法而得成就，隱沒自在。是印度中復有諸金剛阿闍梨，所謂賢軍、德軍、寂靜軍、烏多羅軍、無邊藏、天藏、善力藏等。復有諸婆羅門，所謂捺多婆羅門、訶哩三謨婆羅門、奔茶利迦婆羅門、鉢訥摩婆羅門，如是等阿闍梨婆羅門等，得聞菩薩所說金剛大乘及相應三摩地法，皆悉獲得無生法忍。時西印度王百臂，及彼中宮后妃^姪女等，聞菩薩所說甚深金剛大乘及諸法要，皆悉證得金剛智所攝相應三摩地成就法，及隱沒自在。彼印度中復有眾多金剛阿闍梨，所謂智密、善密、賢密、慧密、慧賢、無垢賢等。亦有諸毘舍，所謂善意毘舍、印捺囉波毘舍、印捺囉囉毘舍、淨光毘舍等。是阿闍梨及毘舍等，得聞菩薩所說最上金剛大乘及諸妙法，皆悉證得無生法忍。北印度王尾哩野^(二合)嚩哩摩，與中宮后妃^姪女等，及諸人民沙門婆羅門等樂入金剛大乘者，於是法中得聞菩薩演說法要，亦於金剛智所攝真實相應三摩地成就，及隱沒自在。爾時金剛手菩薩。為彼諸王及沙門婆羅門乃至毘舍等，於六年中演說金剛大乘及諸法要，使彼諸王及樂法之眾悉獲利樂。又復演說諸成就法，謂八大聖藥，眼藥、劍、羂索、金剛輪、金剛杵、寶瓶、革屣等。及人修羅窟，乃至敬愛諸成就法。時諸王及一切沙門婆羅門等，而常隨逐聽受教導。

「爾時金剛手菩薩告彼眾言：『今彼處有大名山號摩呬捺囉，其山頂上平正廣闊，亦有園苑池沼適悅之所。汝等諸王及沙門、婆羅門、吠舍、首陀等所有修學金剛大乘，皆可同往彼山修習而住。』後於異時，忽告眾曰：『彼日清淨光明如來應正等覺將入涅槃。汝等今可與我同至佛所求受灌頂。』時修習金剛大乘諸會眾等，即與菩薩共持種種殊妙香華，往詣日清淨光明如來之所。既至彼已，奉上香華作大供養，旋繞讚歎，頭面著地禮佛^雙足。修敬畢已，共坐佛前。

「爾時金剛手菩薩於眾會前，偏袒右肩右膝著地，金剛合掌安自心上，白世尊言：『我承如來教勅往彼王宮，為諸王等及沙門婆羅門

乃至一切發菩提心求學金剛大乘者，即為演說金剛大乘，及於諸根境界所緣所作種種之法，皆令獲得無生法忍。世尊！我今欲於如來金剛大乘法中，與彼學眾求受灌頂。唯願如來慈悲聽許。』爾時日清淨光明如來左右顧視已，即於口中放大光明。其光五色，於剎那間照於恒河沙等諸佛剎土，上至梵世悉皆照耀。如是照已，尋復旋還，却從世尊口中而入。時彼光明所照佛剎一切如來，悉皆稱讚作如是言：『彼金剛大乘即攝一切乘，乃至過去未來現在亦復如是，彼金剛大乘即攝一切乘。』時彼學眾即於金剛大乘悉得灌頂。得灌頂已，咸以頭面禮世尊日清淨光明如來及金剛手菩薩足，復繞千匝歡喜讚歎，各還本處。

「爾時日清淨光明如來於後不久入般涅槃，佛涅槃後法住千歲。時金剛手菩薩復往摩訶捺囉山中安住。時一切金剛大乘學眾互相謂言：『我等本師菩薩還止彼山。我等宜應同往彼山奉事供養，及自修習金剛大乘一切事業。』時彼學眾一切沙門婆羅門等，各持香華及諸供具，即同往詣摩訶捺囉山金剛手菩薩所。至彼山已，各各奉上香華寶玩供養菩薩，旋繞禮拜瞻仰而住。於是菩薩見彼學眾咸來山中親近供養，修習事業志意堅固，即告眾曰：『汝等各各於我最上金剛大乘聞諸法要，悉皆證得無生法忍盡涅槃界。汝等諦聽，我師日清淨光明如來已入涅槃，眾生薄福無所恃怙，我所告汝汝善遵行。佛入滅後，彼金剛阿闍梨是汝等師。何以故？彼阿闍梨而能護持佛剎，復能護持金剛祕密法，故能說四字名，此即是如來相。汝等大眾當於彼師，常加尊重禮拜供養同於佛想，即感一切如來常加擁護，即是見前一切如來。汝等學眾常於彼師奉事供給，凡所受用坐臥等具、衣服湯藥、一切所須無令闕乏。雖常侍近，不得足蹋師影。所有同學，無分親疏一心平等。善男子！若有學人及諸人等，於金剛阿闍梨及金剛大乘諸學眾等生不信心，發起惡念復加毀謗，是人果報當墮地獄、畜生及諸惡趣。何以故？以一切諸法從彼生故。若有毀者是即毀法，故獲是報。若有眾生未斷輪迴來求學者，當隨根性為他演說金剛大乘，當令得入金剛三昧。』金剛手菩薩又復告言：『此金剛大乘即是一切如來，一切如來即是大智。汝等學眾若有不依三昧違我教者，令汝破壞由如灰燼。』於是菩薩即以金剛水與學眾等飲，復結大忿怒印安著學眾頂上。作加被已，又復告言：『佛子！汝今此身即為金剛三昧所持。若有違犯不依從者，以我金剛三昧印及忿怒印令彼破壞。』又復菩薩即如先佛法式，為諸學眾授於灌頂，復誦警覺真言令其覺悟。又復示與金剛杵，自稱己名，與諸弟子身分八處而作加被。時金剛大乘學眾於菩薩所受學一切法式畢已，即向菩薩種種稱讚恭敬供養，謝彼菩薩。又復白言：『我等各各如菩薩教。於金剛阿闍梨所，承事供養恭敬讚歎，一如

聖旨。』爾時金剛手菩薩摩訶薩化事畢已，即於彼處隱沒不現。」

◎

最上大乘金剛大教寶王經卷上

最上大乘金剛大教寶王經卷下

西天譯經三藏朝散大夫試鴻臚卿傳教大師臣法天奉 詔譯

◎爾時世尊復告印捺囉部帝大王言：「大王！汝於往昔過去無量阿僧祇大劫之前，日清淨光明如來法中已曾為王號精進授。汝於是時與諸學眾，於彼佛處已曾求學金剛大乘及諸法要。汝今於此娑訶世界我釋迦牟尼佛所，又復求學如是金剛大乘。」時印捺囉部帝聞此語已，即復合掌白世尊言：「云何名為菩薩摩訶薩？」佛言：「若有樂行大慈大悲大喜大捨，是即名為菩薩摩訶薩。」

爾時世尊說是語已，顧視左邊，告金剛手菩薩言：「汝可同彼過去劫前日清淨光明如來之時，為印捺囉部帝大王說金剛大乘，及說菩薩摩訶薩行，諸根境界等種種之法，方便令解使獲無生法忍。」時金剛手菩薩摩訶薩即從座起，偏袒右肩，頭面著地禮世尊足已，合掌當心而白佛言：「我今當承如來教勅而為演說。」印捺囉部帝聞是語已，身毛喜豎心大忻踊，即從座起禮世尊足已，復禮金剛手菩薩足，禮已白言：「唯願菩薩遵奉佛勅，往詣我宮，為我演說。」爾時金剛手菩薩承佛教勅，又復觀彼印捺囉部帝身心虔切，默然許之。印捺囉部帝知默許已，即禮金剛手菩薩足，歡喜踊躍禮佛而退。即整四兵前後導從，乃與菩薩同乘寶車，及張傘蓋動種種樂，尊敬供養還歸曼識羅補曠大城。於其城中菩薩所經之路，一切人民各以香華奉獻供養。既至宮已，時印捺囉部帝預嚴七寶大師子座，菩薩下車即昇彼座。王及中宮后妃眷屬，復設種種香華珍寶及殊妙衣作大供養，復以寶瓶盛滿闍伽香水奉上菩薩。

爾時金剛手菩薩摩訶薩即如從佛所聞金剛大乘祕密相應三摩地、三摩鉢底、種種諸法廣為演說，欲令王等證無生忍盡涅槃界。是時復有眾多沙門、婆羅門、刹帝利、毘舍、首陀等，亦來王宮，為欲聽聞金剛大乘及諸妙法。又有東印度摩羅嚩國法光大王，北印度無能勝王，西印度月光大王，摩伽陀國頻婆娑羅王，舍衛國波斯匿王，梨蹉尾國梵授王等。復有無數沙門、婆羅門、刹帝利、毘舍、首陀，及無數發菩提心眾生，欲聞法故亦來王宮。如是人等各於菩薩信重歡喜來至王宮。如是人等各各深信歡喜踊銳，白金剛手菩薩言：「我等樂入金剛大乘，及欲聽聞種種妙法。」於是金剛手菩薩而於六年為於諸王及諸人眾演說金剛大乘諸菩薩行，及無數百千俱胝相應三摩地、三摩鉢底，乃至於諸境界所緣所作一切諸法，廣為演說。

爾時印捺囉部帝得聞法故，於一切如來相應法中證三摩地、三摩鉢底，得無生忍盡涅槃界，及得隱沒自在。乃至中宮后妃眷屬國內民

庶，得聞金剛大乘及諸法要，皆悉證得無生法忍。國中復有金剛阿闍梨所謂善龍、義龍、寶聲、戒聲、發光聲，復有婆羅門所謂法龍、力賢等，得於金剛大乘法中證無生忍盡涅槃界。彼東印度摩羅國法光大王，於最上金剛大乘法中悟得最上根本相應法，得無生忍盡涅槃界，及得隱身自在。乃至中宮后妃眷屬國中士庶，得聞金剛大乘及諸妙法，皆悉證得無生法忍盡涅槃界。是印度中復有金剛阿闍梨名曰賢天、如來天、善天，又有剎帝利邪輸嚩哩摩、爾嚩嚩哩摩等，亦於金剛大乘法中得聞法故，悉皆證得無生法忍盡涅槃界。

復有北印度無能勝王，得聞金剛大乘及諸法要，乃於真實攝教中證得相應三摩地，得無生忍盡涅槃界，及得隱身自在。亦有中宮眷屬后妃嬪嬙乃至士庶，得聞金剛大乘一切妙法，皆悉證得無生法忍。彼印度中亦有金剛阿闍梨名曰賢喜、蓮喜，又有剎帝利名曰烏那野嚩哩摩，及有毘舍名曰法密，如是等眾於金剛大乘得聞法故，皆悉證得無生法忍盡涅槃界。

復有西印度月光大王，於金剛大乘聞諸法故，證得金剛口相應三摩地等，得無生忍盡涅槃界，及得隱身自在。亦有中宮后妃嫔女乃至士庶等，又有金剛阿闍梨名曰不空成就、普成就、如來成就等，又有剎帝利名曰善密及蘇哩野嚩哩摩，如是眾等於金剛大乘聞妙法故，皆悉證得無生法忍盡涅槃界。

爾時金剛手菩薩摩訶薩為彼諸王及一切學眾演說金剛大乘一切諸法，又復演說八種成就之法，所謂聖藥、眼藥、革屣、劍、羂、索、金剛輪、金剛杵及寶瓶等成就之法，又復演說入地入修羅窟成就之法，又復演說菩薩摩訶薩依金剛大乘所行之行，諸根境界所緣所作種種之法，令彼學眾各各修習離於懈怠。時金剛手菩薩於六年中，為諸王等及求學金剛大乘一切學眾，以種種方便譬喻言辭，演說諸法各令證悟已，即告眾曰：「汝等當知今彼處有大名山號乞乞那，其山頂上平正廣闊，亦有林樹池沼適悅之地。我今先往，汝等入金剛大乘諸王、沙門、婆羅門、毘舍、首陀一切學眾，亦可於彼俱往集會。」是時學眾於彼山頂皆集會已，金剛手菩薩即復告言：

「今者世尊釋迦牟尼將入涅槃。汝等今可與我同至佛所求受灌頂。」爾時學眾即與金剛手菩薩同離彼山。是時諸王將理四兵前後導從，及備種種諸大供養往世尊所。爾時世尊釋迦牟尼已在拘尸那城，金剛手菩薩摩訶薩與諸學眾至佛所已，設大供養奉獻世尊，右繞三匝禮拜讚歎於佛前坐。時金剛手菩薩即從座起，偏袒右肩右膝著地，作金剛合掌白世尊言：「我奉佛勅，以菩薩摩訶薩行於金剛大乘法中，為學眾說於諸根境界所緣所作及種種諸法，各各證悟或

得三摩地、三摩鉢底，或得法忍盡涅槃界，或得隱身自在。世尊！我已如是說法利益。今來佛所，欲為彼眾於如來處求受灌頂。」爾時世尊左右顧視已，即於頂門放五色光，其光晃耀，於一剎那間照如恒沙佛剎上至梵世。如是照已，尋復旋還，却從世尊頂門而入。爾時十方光所照處，一切如來異口讚言：「金剛大乘即攝一切乘，乃至過去未來及與現在一切諸佛，皆說如是金剛大乘攝一切乘。」爾時世尊即以金剛水與一切金剛大乘學眾灌頂。諸學眾等得灌頂已，皆用頭面著地禮世尊足，及禮金剛手菩薩足。禮已讚歎踊躍，繞百千匝各還本處。

爾時尊者阿難白佛言：「世尊！如是正法，當云何名？云何受持？」佛言：「阿難！今此正法，名為最上大乘寶王如是受持。」爾時如來應正等覺釋迦牟尼說是經已，即於俱尸那城入般涅槃。金剛手菩薩於後却還乞乞那山，亦有眾多菩薩聲聞同來山中。時金剛學眾互相謂言：「我等本師金剛手菩薩摩訶薩却復乞乞那山，我等宜應亦往彼山親近供養。」是諸學眾各持種種香花寶玩同往彼山。到彼山已，各以香花奉上供養，禮拜旋繞、恭敬讚歎，各一面坐。爾時菩薩觀視會眾沙門、婆羅門、剎帝利、毘舍、首陀等已，即復告言：「汝等學眾諦聽。汝已各各於此金剛大乘悉得證悟，皆是得金剛大乘法者。汝等當知，佛涅槃後，金剛阿闍梨是汝等師。亦如往昔無量劫前，日清淨光明如來出世之時，彼大妙香佛剎中有王名精進授，彼時我亦如是說承事金剛阿闍梨軌則。今亦復說弟子承事金剛阿闍梨軌則，承事之則乃有八種。」時印捺囉部帝白金剛手菩薩言：「云何名為八種承事之則？」金剛手言：「一者不得呼師名字；二者常自稱師足；三者與師執持鞋履；四者掃灑房地；五者為師敷置床座；六者五體作禮；七者不侵害師；八者指授稟信。是名弟子承事金剛阿闍梨八法。彼阿闍梨以此八事觀察弟子，以日累月、積月成歲。若彼弟子於此八事，無有違背專心不退，阿闍梨然可攝受。」

爾時金剛手菩薩又復告言：「譬如世間蟲[月*虫]飛蛾之類，皆從緣生，墮斯惡趣何由出離？亦如世間輪迴眾生，云何轉業得無生滅？若不因從金剛阿闍梨攝受，為說種種妙法，何由能除一切煩惱，證於寂滅得不退轉？大王！彼金剛阿闍梨，先當觀察所攝弟子行相貴賤等，乃可付與二諦之法。」王言：「云何名為二諦？」菩薩告言：「一者真諦，二者俗諦。」王言：「何名真諦？」菩薩告言：「所謂內空、外空、內外空、空空、大空、勝義空、有為空、無為空、畢竟空、無際空、無變異空、本性空、一切法空、無所有空、無性空、自性空、自相空、無性自性空。大王！是十八空者乃名真諦。」大王復言：「云何名諦？」菩薩告言：「若於此十八

空，知非常非無常，是故名諦。何以故？謂不見內空、不見外空、不見內外空、不見空空、不見大空、不見勝義空、不見有為空、不見無為空、不見畢竟空、不見無際空、不見無變異空、不見本性空、不見一切法空、不見無性空、不見自性空、不見自相空、不見無所有空亦不見無性自性空。於如是空不見二相，中亦不可得，非生非滅、非縛非脫、非行非住、非明非暗、非實非虛、非輪迴非涅槃，亦不增亦不減。我說如是種種，皆離身口意，是則名為真諦。」大王復言：「云何名為俗諦？」「謂以四無量心，於威儀本相五蘊、四界、六入、五境，行住三界，是即名為俗諦。」王復問言：「更復何名真諦？」菩薩告言：「彼種種色相，如幻化、如陽焰、如水中月、如水上泡、如鏡中像、如夢、如電、如乾闥婆城，乃至虹霓等。若於色相得如是見，是則名為真諦。若於如是諸法受行不離苦行，乃能證佛得一切智。大王！乃至遍六俱胝文字之義，亦無二無分別。一切如來皆如是說。彼智金剛教汝已悉聞，是等皆名真諦。大王！若於二諦不能如實觀察了知，雖專修習經無量劫，唐捐其功，終不能到大智彼岸。而此二諦乃是一切如來之所歸命，為父為母、為寂靜住及為涅槃、為阿吠嚩哩帝迦、為正遍知覺一切三摩地、為精妙普門三摩地，乃有如是等種種功德。大王！彼一切金剛大乘學眾，必須專心揀選如法弟子，乃可為說如是二諦。是二諦法難可得聞，雖彼緣覺聲聞亦難得聞，何況外道等。」爾時印捺囉部帝與金剛大乘學眾得聞是說，悉以頭面禮謝菩薩。

時印捺囉部帝復白菩薩言：「揀選弟子當有何相？」菩薩告言：「有四種弟子，有五補特伽羅。」王言：「四種弟子當云何說？我今樂聞。」菩薩告言：「第一佛乘、第二初乘、第三初學菩薩行、第四諸菩薩摩訶薩行。此名弟子四種之相。」「云何分別如是之相？」菩薩告言：「彼得安然，非謗非信，於真言印相一一曉了，證於佛乘。於意云何？譬如盲者，得人引導。由得佛乘證解脫故，弟子初依師學得一俗諦，初相應法入三摩地，未能了知顯密二教，亦未知二諦十二因緣，亦未知般若波羅蜜，是名弟子初修習相。」王言：「云何菩薩五種補特伽羅？」菩薩言：「所謂囉怛曩補特伽羅、贊捺囉補特伽羅、鉢訥摩補特伽羅、奔拏哩迦補特伽羅、烏怛鉢攞補特伽羅。是等於聞、信、戒、施悉能具行為烏波薩迦。」王言：「菩薩此之名相云何分別？」菩薩告言：「於一切法雖得聽聞，而於少時皆悉忘失，此名烏怛鉢攞補特伽羅。若於祕密之法雖有所聞，不能為他分別演說，譬如軍尼內藏明珠而不顯現，此名奔拏哩迦補特伽羅。或得信心大悲心聞法開解，如竹無節受持通達，此名鉢訥摩補特伽羅。凡聞法義咸存我見，譬如擊鼓空有其聲，以有我見不能利他，此名贊捺囉補特伽羅。是四烏波薩迦，而能一向

專心求一切法，信心受持住金剛乘，復次心性猛利、多聞持戒、一切能捨、了知真實，凡所說法能隨根機，是名囉怛曩補特伽羅。此一烏波薩迦，常能為諸弟子說種種法。時金剛阿闍梨如是選擇弟子，若得清淨殊勝如法弟子，乃可傳付祕密大乘一切勝義，當令修習不斷聖種。」印捺囉部帝又復問言：「云何分別祕密大乘？」菩薩告言：「彼瑜伽顯密二教曼拏羅有二十種，皆悉得名祕密大乘。我今略說灌頂曼拏羅次第。彼灌頂阿闍梨欲作灌頂法，先自結淨，選揀勝處，安曼拏羅位。後令弟子結淨已，然阿闍梨加持五色線五色粉餅地結界作曼拏羅，安布賢聖位，復加持闍伽瓶安方位已，然請召賢聖依位坐畢，即獻香花闍伽等，然可引弟子入曼拏羅與授灌頂。弟子得灌頂已，即持種種香花珍寶奉獻阿闍梨。弟子此後即是入金剛大乘處灌頂位，當於自己身口意業深加省察，若不了達是名五燈，若不了達當名五闇。復次分布火壇次第，所有使用種種之物，先備播帝哩罕嚕嚕等，及所鋪座吉祥草及護摩柴，其柴當用青潤樹枝及五穀酥等。或作護摩，先燒祭火天，然作護摩。觀於火焰色相形像及聲香等，若得吉祥是法成就，若不吉祥是不成就。其請召賢聖入曼拏羅，及獻闍伽次第諸式，大略相同。凡所有法皆從金剛大乘祕密流出，所有三瑜伽、五烏補捺伽多，或六俱胝文字義、或說法成就義、或決定義，或說本行尼陀那方便因等，如是所說或四種或五種或七種或十二種，種種不定，皆不離二諦。復次說四密，所謂密教、密義、密語、密句。若於四密無差，所作成就。或遇九執大曜、諸惡星宿及諸毒等，持誦密句皆可大息。或求敬愛、或作增益、或作降伏，若為人及四足多足無足等，或降伏諸惡大部多夜叉，乃至惡人等並可降伏。若不降伏，必當破壞親愛分離。或有一切禁縛邪明，一切破壞。或有冤家興兵欲來侵害，自然退散。或為大旱，必能降雨。如是種種一切所求，持念密句悉得成就隨心如意。凡持誦密句，作金剛語音，無令斷絕，必滿所願。」王言：「云何名為菩薩禪定？」菩薩告言：「禪定有種種，持誦亦種種。若知祕密句，即是知禪定。祕密者，為所誦文句具足，及知印相。若如是者，有大威力，是則白法。知祕密者即攝真實理，由如虛空體寂靜故。解於世法能顯真理，乃於印相觀想密句文義，所作斷疑。此持誦者乃名為賢。如是行人凡有見者，皆如佛等。彼人禪者，不見密句、不見印相、不見賢聖，想諸字輪體同鏡像。」王復問言：「云何菩薩三摩地？」菩薩言：「彼菩提心及智慧方便，乃至三明及無等等，此皆是菩薩三摩地。又復觀自本身及真言印相、賢聖形像一切莊嚴，皆如虛空寂靜，是菩薩三摩地。菩薩入如是三摩地，是名安住二諦。」

爾時金剛手菩薩摩訶薩為印捺囉部帝及諸剎帝利、一切入金剛大乘學眾，說如是種種法已，即依法作曼拏羅，與王等及諸學眾受於灌頂。彼諸學眾得灌頂已，異口同聲各各白菩薩言：「我等稟教奉事金剛阿闍梨，一如聖旨。」是學眾等於金剛手菩薩摩訶薩供養恭敬，種種言辭誦讚謝已。

爾時會中諸大菩薩，及聲聞、天人、阿蘇囉、誑嚕拏、彥達嘑、緊曩囉、一切大眾，聞菩薩說是經已，歡喜信受作禮而退。金剛手菩薩即於山中隱沒不現。

最上大乘金剛大教寶王經卷下

[CBETA 贊助資訊](https://www.cbeta.org/donation/index.php)

[.\(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。(銀聯卡不支援定期定額)

[前往捐款](#)

劃撥捐款

郵政劃撥帳號：5 0 4 6 8 2 8 5

戶名：財團法人佛教電子佛典基金會

欲指定特殊用途者，請特別註明，我們會專款專用。

線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人佛教電子佛典基金會」。

For donations by check, please write the check to
"Comprehensive Buddhist Electronic Text Archive
Foundation".
